

Siunnersuummut nassuiaatit

Nassuiaatit nalinginnaasut

1. Aallaqqaasiut

Sanaartornermi neqerooruteqartitsisarneq pillugu Inatsisartut inatsisaat (Inatsisartut inatsisaat nr. 11, 2. december 2009-meersoq) – naatsumik oqaatigalugu neqerooruteqartarnermut inatsit – 1. januar 2010-mi atuutilerpoq.

Neqerooruteqartarnermut inatsisip atuutilerneraniit piffissap ingerlanerani misilittakkat atatsimut isigalugit pitsaasimapput. Neqerooruteqartut kinaassusersiunnngitsumik assigiimmillu pineqarnissaannik, kiisalu naammaginatsumik unammilleqatigiissitsinissamut qulakkeerinnissamik inatsimmi siunertaasup annersaa naammassineqarsimasutut isigineqarpoq.

Kisiannili sanaartornermi ineriartornerup kingunerisaanik neqerooruteqartarnermut inatsimmi ataasiakkaanik allannguinnissaq pisariaqalersimavoq naapertuutilersimallunilu.

Tassalu ineriartortoqarnerani sumiiffinni arlalissuarni unammilleqatigiinneq annertuumik allannguuteqarsimavoq, pingaartumik sanasut naalagaasa sanaartornermilu suliffeqarfiit ikilingaatsiarnerisa kingunerisaanik. Neqerooruteqartarnermut inatsimmi tamanut ammasumik neqerooruteqartitsisarnissamut piumasaqaat (annertunerpaamik unammilleqatigiittoqarnissaa anguniarlugu) pisuni amerlasuuni pissusiviusunut naapertuutinngitsututut misigineqartarpoq. Allaffissornikkut artorsarnerinnarmik kinguneqartanngilaq, aammali neqerooruteqartitsinerit ingerlanneqarnerini saniatigut aningaasartuuteqarfiusarpoq.

Neqerooruteqartarnermut inatsimmi ataasiakkaanik allannguisoqarnissaa, taamaalillunilu unammilleqatigiinnerup eqqarsaatigineqarnerata aamma neqeroortitsinermi suliat eqaannerusumik ingerlanissaasa eqqarsaatigineqarnerata akornanni pitsaanerusumik oqimaaqatigiissitsisoqalernissaa siunnersuutigineqarpoq.

Tamatuma saniatigut aaqqissuussinermik, neqerooruteqartitsisup neqerooruteqartitsinissaq pillugu siumoortumik nalunaarummik tamanut ammasumik saqqummiussivigisinnaasaanik atuutsitsisoqalernissaa siunnersuutigineqarpoq.

Kommunit ingerlatseqatigiiffiisa inatsimmut ilaanerat, kisiannili sanatitsisut namminersortut, inissianik aningaasalersuisarneq pillugu inatsit naapertorlugu taarsigassarsititsinissamik neriorsuummik pigisaqartut ilaanginnerat inatsisip oqaasertaanut allanneqassasoq siunnersuutigineqarpoq.

Kiisalu neqerooruteqartarnermut inatsit naapertorlugu aalajangiinerit pillugit maalaaruteqartarnermut aalajangersakkat kingunerisassaasa iluarsineqarnissaat siunnersuutigineqarpoq, Pisortani Pisiniartarnermut Neqerooruteqartitsisarnermut Maalaaruteqartarfik pillugu Inatsisartut inatsisaanni neqerooruteqartarnermut inatsimmik unioqqutitsinerit pillugit maalaarutininik suliaqarnissamut piginnaatitaaffik maalaaruteqartarfimmut tassunga inissinneqarmat.

2. Siunnersuummi immikkoortut pingaarnertit

Siumoortumik nalunaaruteqartarneq

Aalajangersakkamik nutaamik, neqerooruteqartitsisut siumoortumik nalunaarutininik tamanut ammasumik saqqummiussinissaannut periarfissiiffiusumik atuutsitsisoqalernissaa siunnersuutigineqarpoq. Siumoortumik nalunaarut tamanut ammasumik neqerooruteqartitsisarnermut tunngavissat assingi atorlugit tamanut ammasumik saqqummiunneqartassaaq.

Aalajangersakkap atuutilernerata kingunerisaanik pisortani neqerooruteqartitsisartut tunngaviusumik neqerooruteqartitsinissat, piffissami siumoortumik nalunaarummi pineqartumi neqerooruteqartitsisussat ingerlatassatut naatsorsuutigisai tamarmik paasissutissiissutigineqartassapput. Siumoortumik nalunaarutip minnerpaamik imassai pillugit paasissutissat suussanersut pillugit aalajangersakkamik aalajangersaasoqarpoq. Tamatuma saniatigut siumoortumik nalunaarutip sivilunerpaamik qaammatinut 12-inut tunngasuunissaa aalajangersarneqarpoq.

Siumoortumik nalunaaruteqartarnermi siumoortumik neqerooruteqartitsinani aamma isumaqatigiiffiusumik neqerooruteqartitsinani killilimmik neqerooruteqartitsinermi neqerooruteqartitsisoq neqerooruteqarnissamut soqutiginnittunik aggersaanissamut periarfissaqarpoq, Neqerooruteqartitsisussap niuerfimmi soqutiginnissinnaasunik ujartuisinnaanissaa siumoortumik nalunaaruteqartarneq pillugu maleruagassami siunertarineqarpoq. Tamatuma saniatigut neqerooruteqartitsisup neqerooruteqartarnermut inatsimmi siumoortumik neqerooruteqartitsinani aamma isumaqatigiiffiusumik neqerooruteqartitsinani killilimmik neqerooruteqartitsinermi piumasqaatit qanoq isiginiarneqassanersut ajornaatsumik qulaajarnissaat periarfissaqarfigissavaa.

Siumoortumik neqerooruteqartitsisarneq

Suliassami ataatsimi qanoq ilinerani siumoortumik neqerooruteqartitsisoqarnissaanut aningaasanut killigititaasut 500.000 koruuniniit 1.500.000 koruuninut qaffanneqarnissaat siunnersuutigineqarpoq. Taamaalilluni suliassat annerpaamik katillugit 1.500.000 koruuninik nalillit tamanut ammasumik neqerooruteqartitsivigineqarnissaat pisussaaffeqarfiujunnaassaaq.

Aningaasat 500.000 koruuninut killilerneqarnerat neqerooruteqartarnermut inatsit atuutilermalli iluarsineqarsimanngilaq. Aningaasat 1.500.000 koruuninut killilerneqarnissaat akit

ineriartornerinut aamma sanaartornermik niueruteqarnermi tamarmiusumi pissutsit eqqarsaatigalugit naleqquttutut isumaqarfigineqarpoq. Aamma pisortat neqerooruteqartitsinerannut aningaasartuutaasartut piffissarlu atorneqartartoq aningaasanut killiliussat qaffannissaannut tunngavilersuineranut pisolooqataapput.

Tamatuma saniatigut neqeroorutit, neqerooruteqartitsisup missingersuutaannut naleqqiullutik qaffasippallaartut naleqqutinngitsutut isigineqartarnerisa erseqqissarneqarnissaa siunnersuutigineqarpoq.

Erseqqissaatissatut siunnersuutigineqartoq pisariaqartinneqartoq misilittakkanit takutinneqarpoq. Tassani tunngaviusumik neqeroorutip ilaatinneqarnissaminut naleqqunnissaanut tunngavissatut atuuttoq allanngortinneqanngilaq. Neqeroorut neqerooruteqartitsineranut tunngaviusunik malinniffiuppat, neqeroorut naleqquttutut isumaqassaaq.

Kiisalu suliffeqarfiit amerlanerpaamik pingasut – sionatigut suliffeqarfik ataasiinnaasara-luortoq – suliassamik isumaginninnissamut periarfissaqarpata, siumoortumik neqerooruteqartitsisoqarsinnaassasoq siunnersuutigineqarpoq. Taamatulli pisoqartillugu siumoortumik neqerooruteqartitsinermi neqerooruteqartitsisup suliassat suut qaqugulu neqerooruteqartitsisumit suliaritinniarneqarnermut siumoortumik tamanut ammasumik nalunaaruteqarsimanissaa piumasarineqarpoq (matuma siuliani siumoortumik nalunaaruteqartarneq pillugu allaaserisaq takuuk).

Assersuutigalugu nunap immikkoortuani pissutsit peqqutaallutik entreprenørit aalajangersimasut – pingaarnertut najukkani entreprenørit – kisimik suliassamik isumaginninnissamut periarfissaatillugit, siumoortumik neqerooruteqartitsinngikkaluarluni killilimmik suliariumannittussarsiuussinerup atorneqarsinnaanissaanik periarfissiinissaq aalajangersakkami siunertarineqarpoq.

Suliassat amerlanerpaamik katillugit 500.000 koruuninik nalillit

Suliassat akiligassanngortinneqartussat aningaasartaasa killinginik maanna atuuttunit 300.000 koruuniniit 500.000 koruuninut qaffaanissaq siunnersuutigineqarpoq. Taamaalilluni suliassanut, katillugit annerpaamik 500.000 koruuninut nalilinnut neqerooruteqartitsinissaq pisussaaffiujunnaassaaq.

Aningaasanut killissarititaasut 300.000 koruunit neqerooruteqartarnermut inatsit atuutilermalli iluarsineqarsimangillat. Akit ineriartornerat aamma sanaartornermi niuerneranut atugassarititaasut tamarmiusut eqqarsaatigalugit aningaasat 500.000 koruuninut killilerneqarnissaat naapertuuttutut isumaqarfigineqarput.

Kommunini ingerlatseqatigiiffiit

Kommunini ingerlatseqatigiiffiit neqerooruteqartarnermut inatsimmut ilaatinneqarnissaat siunnersuutigineqarpoq.

Neqerooruteqartarnermut inatsisip atuutilernerata kingorna piffissami ineriartorneq nutaaq takuneqartalerpoq, tassalu kommunit ineriartortitseqatigiiffii inissiaatileqatigiiffiilu, inissianik pigisaqarnissamik sanaartornissamillu siunertaqartut. Taamatut ineriartortoqarnera peqqutaalluni kommunit ingerlatseqatigiiffiisa neqerooruteqartarnermut inatsimmut ilaatinneqarnissaannik aalajangiinissaq naleqqutilersimavoq naapertuutilersimallunilu.

Namminerisamik inissialiortiternerit, pisortanit taarsigassarsititsinissamut neriorsuuteqarfiusut

Namminerisamik inissialiortiternerit, inissianut aningaasalersuisarnej pillugu Inatsisartut inatsisaat naapertorlugu pisortanit taarsigassarsititsinissamut neriorsuuteqarfiusut neqerooruteqartarnermut inatsimmut ilaatinneqannginnissaat siunnersuutigineqarpoq.

Taamaalilluni sanatitsisut namminersortut, inissianut aningaasalersuisarnej pillugu Inatsisartut inatsisaat naapertorlugu taarsigassarsinissamut neriorsuuteqarfineqartut piginneqatigiilluni inissianut, piginneqatigiilluni inissiaatillit peqatigiiffiannut tunniunneqannginnerminni sanatitsisunit namminersortunit sananeqartunut, aammalu sanaartornerup nalaani aningaasalersorneqartunut sanilliunneqassapput. Aalajangersakkami namminersortut inissianik sanaartornissamut suliniuteqartarnerisa siuarsarneqarnissaat siunertarineqarpoq.

Maalaarutit

Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaata (maalaaruteqartarfik pillugu inatsit) atuutilerneratigut Neqerooruteqartitsisarnermut Maalaaruteqartarfik atorunnaarsinneqarpoq. Taamaalilluni neqerooruteqartarnej pillugu inatsimmik unioqqutitsinerit pillugit maalaarutit Pisortani Pisiniartarnernut Neqerooruteqartitsisarnermut Maalaaruteqartarfimmit suliarineqartartussanngorput.

Siunnersuutip atuutilerneratigut maalaaruteqarsinnaaneq sanaartornermik immikkoortumut allannguuteqartinneqarani atuutsiinneqarpoq, naak maalaaruteqartarnermut aalajangersakkat neqerooruteqartarnermut inatsimmit immikkoortinneqaraluartut. Tassalu suliariumannittussarsiuussinerit pillugit maalaaruteqartarnermi siunertaasut tunngaviusullu allannguuteqartinneqaratik maalaaruteqartarfik pillugu inatsimmut nuunneqarput, tamannattaarlu maalaaruteqartarfiup suliaanut atuuppoq. Aamma maalaaruteqarnermut akiusut allanngortinneqanngillat.

| Siunnersuummik Inatsisartut inatsisaannut atuuttumut sanilliusseq | |
|---|--|
| <i>Oqaasertaliussat atuuttut</i> | <i>Siunnersuut</i> |
| | § 1 Sanaartornermi neqerooruteqartitsisarneq pillugu Inatsisartut inatsisaanni nr. 11-mi, 2. december 2009-meersumi, Inatsisartut inatsisaatigut nr. 4-kkut, 15. april 2011-meersukkut aamma Inatsisartut inatsisaatigut nr. 18-ikkut, 22. november 2011-meersukkut allannguuteqartinneqartumi allannguutissat uku aalajangersarneqarput: |
| <p>§ 1. Sanaartugassat suliarineqarnissaannut, imaluunniit sanaartugassat pilersaarutitalerlugit suliarineqarnissaannut neqerooruteqartitsisarnermut, aammalu suliakkiissutinik tunniussisarnermut inatsit atuuppoq.</p> <p><i>Imm. 2.</i> Neqerooruteqartitsisartunut ukununnga inatsit atuuppoq:</p> <p>1) Namminersorlutik Oqartussat, ingerlatseqatigiiffiit Namminersorlutik Oqartussanit aalajangiisarnikkut sunniuteqarfigisinnaasaat kii-salu kommunini oqartussaasut.</p> <p>2) Neqerooruteqartitsisut allat, pisortanit tapiiffiqineqarlutik sanaartugassanik neqerooruteqartitsisut, tassungalu qularnaveeqqusiissutit.</p> | <p>1. § 1, <i>imm. 2, nr. 1</i> imatut oqaasertalerneqassaaq:</p> <p>”1) Kalaallit Nunaanni Namminersorlutik Oqartussat, ingerlatseqatigiiffiit aalajangiisarnermi Kalaallit Nunaanni Namminersorlutik Oqartussat sunniuteqarfigisaat kiisalu kommunini oqartussaasut ingerlatseqatigiiffiillu, aalajangiisarnermi kommunit sunniuteqarfigisaat.”</p> |
| <p><i>Imm. 3.</i> Inatsit <i>imm. 2</i> apeqquaatinnagu ukununnga atuutinngilaq:</p> <p>1) Piginneqatigiilluni inissiat, sanatitsisunit namminersortunit sananeqartut aningaasalersorneqartullu, tamatumalu kingorna piginneqatigiilluni inissiaatillit peqatigiiffiannut tunniunneqartut.</p> | <p>2. § 1, <i>imm. 3, nr. 2</i> imatut oqaasertalerneqassaaq:</p> |

| | |
|--|---|
| <p>2) Namminersorluni inissialiat, Inatsisartut inatsisaannut oqaasertaliussat naapertorlugit taarsigassarsititsinissamik neriorsuuteqarfiusut.</p> | <p>”2) Namminerisamik inissialiortiternerit, inissianut aningaasalersuisarneq pillugu Inatsisartut inatsisaat naapertorlugu taarsigassarsinissamik neriorsuuteqarfiusut.”</p> |
| <p>§ 8. Sanaartornermi suliassat sularinerini akiligassiissutaasartut tamanut ammasumik neqerooruteqartitsisarnermut maleruagassanut ilaatinneqanngillat. Sanaartornermi suliassanut sularinerini akiligassiisarneq pissutsit immikkut ittut pissutaallutik pisariaqartitsiviusuni, imaluunniit sanaartugassaq annerpaa- mik 300.000 koruuninik naleqartussaattillugu taamaallaat qaqutigunnaq atorneqarsinnaavoq.</p> | <p>3. § 8, imm. 1-ip immikkoortuisa aappaanni ”300.000 koruunit” imatut allangortinneqassaaq: ”500.000 koruunit.”</p> |
| <p>§ 13. Killilimmik sulariumannittussarsiuussinerit entreprenørit aalajangersimasut kisimik pisariaqartinneqartumik pisinnaasaqartillugit imaluunniit suliap naammassineqarnissaanut pisariaqartinneqartumik immikkut ittumik ilisimasaqartillugit, piukkunnartussarsiuussinertaqanngitsumik ingerlanneqarsinnaapput.</p> | <p>4. § 13-imi imm. 2-tut ivertinneqassaaq:</p> <p>” Imm. 2. Aammattaaq killilimmik sulariumannittussarsiuussinerit siumoortumik neqerooruteqartitsiviunngitsumik ingerlaneqarsinnaapput, nunap immikkoortuani pissutsit pequtaallutik entreprenørit najugaqartut kisimik neqerooruteqarsinnaanissaat naatsorsuutigineqartillugu, aammalu killilimmik neqerooruteqartitsinissamut § 25 a, imm. 4 naapertorlugu aggersaasoqarsimatillugu.”</p> |
| <p>§ 20. Neqerooruteqartitsisut § 1, imm. 2-mi sanaartugassanut suliqartinniakkat ilisimate-reerlugit neqerooruteqartitsisinnaanngillat,</p> | <p>5. § 20 imatut oqaasertalerneqassaaq: ” § 20. Neqerooruteqartut, § 1, imm. 2-mut ilaatinneqartut sanaartugassanut siumoortumik neqerooruteqartitsinermik pissarsiniarsin-</p> |

| | |
|--|--|
| <p>matumani pineqanngippata:</p> <ol style="list-style-type: none"> 1) sanaartugassat katillugit 500.000 koruuninik taakkuluunii inorlugit naleqartut, 2) sanaartugassat aatsaat neqerooruteqartitsinermi tunngavigisat najoqqutaralugit ajornakusuungaatsiartumik aalajangiiffigineqarsinnaasunik annertussuseqartut, pitsaassuseqartut piffissalernerqarsinnaasullu, soorlu misileraanerit, ilisimatusarnerit ineriartortitsinerillu, imaluunniit nutarterinerit, iluarsaassinerit allanngortiterinerillu, imaluunniit suliassat isumannaallisaaneq eqqarsaatigalugu pinngitsoorani suliarineqartussaallutik kinguartinneqarsinnaanngitsut, 3) suliariumannittussarsiuussinermi neqeroorutunik naleqquttunik imaluunniit peqqussutit malillugit suliarineqartunik tiguisoqarsimannginnera, imaluunniit aallaqaammut neqerooruteqartitsinermi piumasagaataasut annertuumik allanngortinneqanngippata qinnuteqaatinik tiguisoqarsinnaannginnera, 4) suliffeqarfik aalajangersimasoq ataaseq kisimi sanaartugassanik suliaqarnissamut periarfissaqartoq, imaluunniit 5) pissutsit immikkut ittut allat aalajangiisuulluinnartumik pingaaruteqartut pissutaallutik entreprenøri aalajangersimasoq toqqarneqartariaqarpat. | <p>naanngillat, matumani pineqanngippata:</p> <ol style="list-style-type: none"> 1) sanaartugassat katillugit 1.500.000 koruuninik taakkuluunniit inorlugit nalillit, 2) sanaartugassat annertussutsimikkut, pitsaassutsimikkut piffissalluunniit ingerlanissaa eqqarsaatigalugu ajornakusoortorujussuarmik neerooruteqartitsinissamut tunngavissat aqquutigalugit aalajangersarneqarsinnaasut, soorlu misiliilluni suliat, ilisimatusarnerit ineriartortitsinerillu ilaat imaluunniit iluarsartuussinerit, iluarsaassinerit allanngortitsinerillu, suliassalluunniit isumannaallisaaneq eqqarsaatigalugu kinguartinneqarsinnaanngilluinnartut, 3) suliariumannittussarsiuussinermi neqeroorummik, tassungalu ilanngullugu aningaasaqarnermut peqqussutilluunniit malillugit naleqquttumik tiguisoqarsimanngippat, imaluunniit aallaqaammut neqerooruteqartitsinermi piumasagaatit annertuumik allannguuteqarsimatinnagit siumoortumik neqerooruteqartitsinissaq pillugu allagarsiinermi qinnuteqaatinik tigusaqartoqarsimanngippat, 4) nunami pissutsit pissutsilluunniit allat pequtaallutik suliffeqarfiit aalajangersimasut pingasut tikillugit kisimik sanaartugassanik suliaqarnissamut periarfissaqarpata, aammalu § 25 a, imm. 4 naapertorlugu isumaqatigiiffiusumik neqerooruteqartitsinissamut aggersaasoqarsimappat, imaluunniit 5) pissutsit aalajangiisuusussat immikkut ittut allat pequtaallutik entreprenørimik aalajangersimasumik toqqaasqartariaqarpat.” |
| | <p>6. Kapitali 6-ip kingorna ivertinneqassaaq:</p> <p style="text-align: center;">” Kapitali 6 a</p> <p style="text-align: center;"><i>Siumoortumik nalunaaruteqartarnerit</i></p> |

| | |
|--|--|
| | <p>§ 25 a. Neqerooruteqartitsisup siumoortumik nalunaaruteqarnermigut, suliassat imaluunniit suliassat taakku ilaannit ilaasa suut neqerooruteqartitsisup neqerooruteqartitsiviginiarnerai saqqummiussinnaavai. Siumoortumik nalunaarut tusagassiorfitsigut imaluunniit tusagassiorfiit elektroniskiusut aqputigalugit allagarsiinikkut tamanut ammasumik saqqummiunneqassaaq.</p> <p><i>Imm. 2.</i> Suliassanut ataasiakkaanut siumoortumik nalunaarut suliassaq suliaritinnigaq pillugu allaaserisamik naatsumik, kiisalu suliassap sularineqartussap sumiinneranut, suliassanut naligititassatut missiliuineramik aammalu piffissamut suliassap aallartiffissatut naatsorsuutigineqartumut allagarsiinersinnaasunullu paasissutissanik imaqassaaq.</p> <p><i>Imm. 3.</i> Siumoortumik nalunaarut taamaallaat suliassanut, ullormit siumoortumik nalunaarutip tamanut ammasumik saqqummiunneqarfianit naatsorsorlugu neqerooruteqartitsisup sivisunerpaamik qaammatit 12-it iluanni neqerooruteqartitsivigitissallugu pilersaarutigisaanut atuutissaaq.</p> <p><i>Imm. 4.</i> Neqerooruteqartitsisup siumoortumik neqerooruteqartitsinani aamma isumaqatigiiffiusumik neqerooruteqartitsinani suliariumannittussarsiuussisarnissami, neqerooruteqarnissamut soqutiginnittunik aggersaanikkut siumoortumik nalunaaruteqartarneq atorsinnaavaa. Siumoortumik nalunaarut neqerooruteqartitsisup suliassamut aalajangersimasumut neqerooruteqartitsinermik aallarniinissaa kingusinnerpaamik sapaatit akunnerinik arfi-neq pingasunik sioqqullugu tamanut ammasumik saqqummiunneqassaaq, taannalu suliassat suut ilaatinneqarnersut, sumiiffik aammalu isumaqatigiissutip naammassinisaanut piffissaaq, kiisalu soqutiginnittut</p> |
|--|--|

| | |
|---|--|
| | <p>saaffiginninnissaannut piffissaq killiliussaq pillugu paasissutissanik imaqassaaq.</p> <p><i>Imm. 5.</i> Neqerooruteqartussat, imm. 4 naapertorlugu siumoortumik nalunaaruteqarnissamut piffissaliussap naannginnerani soqutiginninnerminnik saqqummiussisut neqerooruteqarnissamut qinnutigineqarsinnaapput, tamatumali saniatigut tamatumunnga inatsisitigut piumasqaateqarsinnaanatik.</p> <p><i>Imm. 6.</i> Imm. 4 naapertorlugu siumoortumik nalunaaruteqarneq pillugu maalaaruteqarnissamut, ullormit siumoortumik nalunaarutip saqqummiunneqarfianit piffissaq maalaaruteqarfiusussaq sapaatit akunnerinut sisamanut killilerneqarpoq, tak. Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaanni § 5, imm. 1.”</p> |
| <p>§ 26. Neqerooruteqartitsisarnermut Maalaaruteqartarfimmik, neqerooruteqartitsinerni maalaarutinik suliaqartartussamik suliaassarfiit arlaannaannulluunniit attuumassuteqanngitsumik Naalakkersuisut pilersitsisinnaapput.</p> <p><i>Imm. 2.</i> Neqerooruteqartitsisarnermut Maalaaruteqartarfik ataatsimik siulittaasoqassaaq aammalu sulianut ilisimaarinnittunik marlunik ilaasortaqaassalluni, taakkulu ukiuni sisamani atuuttussanngorlutik qinigaqqissinnaatitaallutillu toqqarneqartassapput.</p> <p><i>Imm. 3.</i> Kalaallit Nunaanni Landsdommerip Neqerooruteqartitsisarnermut Maalaaruteqartarfiup siulittaasussaa, aammalu taassuma sinniisissai ataaseq arlallilluunniit, inatsisilerinermi atorfilittut soraarummeersimasussat toqqassavai. Siulittaasup taassumalu sinniisissaasa toqqarneqarnerani, sapinngisamik eqqartuussisunut fuldmægtigimik toqqaa-</p> | <p>7. § 26 imatut oqaasertalerneqassaaq: ” § 26. Inatsisartut inatsisaat manna, imaluunniit maleruagassat, Inatsisartut inatsisaat manna naapertorlugu aalajangersarneqartut naapertorlugit aalajangiinerit Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaanni maleruagassat naapertorlugit maalaarutigineqarsinnaapput.”</p> |

| | |
|--|--|
| <p>nermi piginnaanerisassat misilittakkatigullu tunngavissat assingi atorneqassapput.</p> <p><i>Imm. 4.</i> Kalaallit Nunaanni sanaartornermik suliaqartut inassuteqarnerisigut, Naalakkersuisut ilaasortassanik sulianik ilisimasalinnik marlunnik kiisalu taakkununga sinniisissanik arlalinnik, tamarmik sanaartornermut ilisimasaqartuusussanik toqqaasassapput.</p> | |
| <p>§ 27. Neqerooruteqartitsisarnermut Maalaaruteqartarfik inatsimmi matumani aalajangersakkanik, taakkulu malillugit malerua-gassianik unioqqutitsinerit pillugit apeqqutiniq suliaqartassaaq.</p> <p><i>Imm. 2.</i> Suliani ataasiakkaani aalajangiinnermi siulittaasoq ilaasortallu sulianik ilisimasallit marluk peqataassapput, taamaattorli tak. imm. 3. Neqerooruteqartitsisarnermut Maalaaruteqartarfiup siulittaasuata, siulittaasoqarfimmi ilaasortat ilaasortallu sulianik ilisimasallit, suliame aalajangiinnermut peqataasussat amerlineqarnissaat aalajangersinnaavaa.</p> <p><i>Imm. 3.</i> Neqerooruteqartitsisarnermut Maalaaruteqartarfiup siulittaasuata ilaasortanik sulianik ilisimasalinnik peqateqarani suliat allakkatigut tunngaviliilluni aalajangiiffigineqarsinnaasut, imaluunniit tunngaviusunut aalajangiisussaannigitsut aalajangiiffisinnavaa, kiisalu suliat ingerlanissaannut apeqqutit aalajangiiffisinnaallugit.</p> <p><i>Imm. 4.</i> Neqerooruteqartitsisarnermut Maalaaruteqartarfiup pissutsit imm. 1-imi taaneqartut pillugit maalaarutitut aalajangiineri, sapinngisamik maalaarutip Neqerooruteqartitsisarnermut Maalaaruteqartarfimmut saqqummiunneqarneraniit sapinngisamik kingusinnerpaamik qaammatit pingasut qaangiunnerini pisassapput.</p> | <p>8. §§ 27-34 atorunnaarsinneqassapput.</p> |

Imm. 5. Naalakkersuisut allatseqarnikkut Neqerooruteqartitsisarnermut Maalaaruteqartarfimmut ikiorsiisassapput, kiisalu Inatsisartuni Naalakkersuisunilu il.il. akissarsiat il.il. pillugit Inatsisartut inatsisaat naapertorlugu maalaaruteqartarfiup ilaasortaasa akissarsiaqartinneqarnissaannut malerua-gassanik aalajangersaasassallutik.

Imm. 6. Neqerooruteqartitsisarnermut Maalaaruteqartarfik sulini pillugu ukiumoortumik Naalakkersuisunut nalunaarusiortassaaq.

§ 28. Suliassaq allakkatigut ilanngussanik agguaaqatigiinnikkut piareersarneqartassaaq, tamatumalu kingorna siulittaasoq allamik aalajangiinngippat oqaluinnarluni isumaqatiginninniutigineqartassalluni.

Imm. 2. Neqerooruteqartitsisarnermut Maalaaruteqartarfiup suliame illuatungeriinnit paasissutissat imaluunniit pissutsit Maalaaruteqartarfiup oqarsinnaatitaaffigisaanut ilaasut pillugit aalajangiinerit sulinermini pisariaqartutut isumaqarfigisani tamaasa piumasarisinnaavai.

Imm. 3. Neqerooruteqartitsisarnermut Maalaaruteqartarfiup oqaaseqaateqartinneqareerneratigut maalaaruteqartarfiup suleriaasissaa aammalu maalaaruteqartarfiup sulineranut maleruagassat sukumiisut Naalakkersuisunit aalajangersarneqassapput, taakkunungalu maalaarutininik tunniussinermit sullissinerit akillu, suliap akiata 1 procentianik annertussuseqartut, annerpaamilli 100.000 koruuniussat, aamma aalajangiinernik tamanut saqqummiussisarnerit ilaapput. Maalaaruteqartoq maalaarumminut taparserneqarpat, imaluunniit suliag Neqerooruteqartitsisarnermut Maalaaruteqartarfimmi suliarineqarnissaminut naleqqutinngitsutut nalilerneqarluni

itigartinneqarpat akiliut utertinneqartassanersoq pillugu Naalakkersuisut malerua-gassanik erseqqinnerusunik aalajangersaasinnaapput.

Imm. 4. Neqerooruteqartitsisarnermut Maalaaruteqartarfiup suliat suliarineqarnerminni 100.000 koruunit inorlugit akeqartut suliarisinnaanngilai.

§ 29. Uku maalaaruteqartarfimmut maalaarumminnik tunniussisinnaapput:

- 1) kikkulluunniit inatsisit tunngavigalugit tamatumunnga soqutiginnittut,
- 2) Unammilleqatigiinnermut Ataatsimiititaliaq, kiisalu
- 3) kattuffiit pisortanilu oqartussaasut, Naalakkersuisut maalaaruteqarnissamut akuerisaat.

Imm. 2. Maalaaruteqartarfiup inuk alla imaluunniit pisortani oqartussaasoq, suliamut annertuumik pingaaruteqartoq, suliakkiisumut maalaarutigineqartumut iluaqutaasinnaasoq suliamut suleqataanissaanut akuerisinnaavaa.

Imm. 3. Kingusinnerpaamik maalaarutip maalaaruteqartarfimmut tunniunneqarneranut peqatigitillugu, maalaaruteqartoq suliakkiisumut unioqqutitsinermut patsisigineqartoq, aammalu maalaarutip maalaaruteqartarfimmut tunniunneqarsimanera pillugu allakkatigut ilisimatissavaa.

Imm. 4. Neqerooruteqartitsinerup inernerata neqerooruteqartumut nalunaarutigineqarneraniit, maalaarummik Maalaaruteqartarfimmut tunniussinissamut piffissarititaasoq sapaatit akunnerinik sisamanik sivilissuseqarpoq.

§ 30. Maalaarut aatsaat, maalaaruteqartarfiup imaluunniit maalaaruteqartarfik sinnerlugu siulittaasup maalaaruteqartup

piumasaqarneratigut tamatumunnga aalajangiippat atuuttussaatinneqarsinnaavoq.

Imm. 2. Neqerooruteqartitsisarnermut Maalaaruteqartarfiup suliaq itigartissinnaavaa imaluunniit tamakkiisumik ilaannaasumilluunniit aalajangiiffigisinnaallugu, tassungalugu ilanngullugu inatsisinik unioqqutitsilluni aalajangiinerit imaluunniit neqerooruteqartitsinernik suliaqarnerit atorunnaarsis-sinnaallugit imaluunniit suliakkiisoq neqerooruteqartitsinermik suliaqarnerminik inatsis-inut naapertuuttunngortitsinissaanik peqqusinnaallugu.

Imm. 3. Maalaaruteqartoq maalaarummi maalaaruteqartarfimmut suliakkiisutigisamini tamakkiisumik ilaannaasumilluunniit taperserneqarsimatillugu, pissutaasut tunngavigalugit maalaaruteqartarfiup suliakkiisoq maalaaruteqartup maleruagassanik inatsimmi matumani taaneqartunik, aammalu maleruagassanik taanna tunngavigalugu suliarineqarsimasunik unioqqutitsinerup kingunerisaa-nik annaasaanut taarsiisussanngortissinnaavaa.

§ 31. Maalaaruteqartoq maalaarummi maalaaruteqartarfimmut tunniussamini tamakkiisumik ilaannaasumilluunniit taperserneqarpat, maalaaruteqartarfiup neqerooruteqartitsisoq maalaaruteqartup maalaarummi suliamut atatillugu aningaasartuutigisimasaanut akileeqqullugu piумаffigisinnaavaa.

§ 32. Maalaaruteqartarfiup aalajangiineri allaffissornermi oqartussaasumut allamut ingerlateqqinneqarsinnaanngillat.

Imm. 2. Maalaaruteqartarfiup aalajangiinerinut atatillugu aalajangiinerup pineqartumut nalunaarutigineqarnerata kingorna, kingu-

sinnerpaamik sapaatit akunnerisa arfineq pingasut qaangiunnerini eqqartuussivinnut suliakkiissutigineqarsinnaapput. Piffissariti-taasup iluani suliakkiisoqanngippat, maalaaruteqartarfiup aalajangiineri inaarutaasumik aalajangiinerussapput.

§ 33. Piaaraluni imaluunniit mianersuaallio-rujussuarluni paasissutissanik eqqunngitsunik paatsoortitsisinnaasunilluunniit Neqerooruteqartitsinermi Maalaaruteqartarfimmut tunni-ussisoq, imaluunniit paasissutissanik suliamut pineqartumut pingaarutilinnik nipangiussisoq, imaluunniit Neqerooruteqartitsinermi Maalaaruteqartarfiup inerteqqutaanik peqqussutaanilluunniit naammassinninngitsoq akiliisussanngortinneqarsinnaavoq.

Imm. 2. Unioqqutitsisoq suliffeqarfiuppat tamakkiisumik ilaannaasumilluunniit naalagaaffimmit, Namminersorlutik Oqartussanit, kommunimit imaluunniit kommunit suleqatigiiffiannit, aktiaatileqatigiiffimmit, anparts-selskabimit, andelselskabimit assigisaanilluunniit pigineqartoq, suliffeqarfik il.il. tassunga akisussaatinneqarsinnaavoq. Taamatuttaaq unioqqutitsineq Namminersorlutik Oqartussanit, kommunimit imaluunniit kommunit suleqatigiiffiannit piliarineqarpat tamanna atuutissaaq.

§ 34. § 28, imm. 2 naapertorlugu paasissutissanik Neqerooruteqartitsinermi Maalaaruteqartarfimmut tunniussinngitsoortoqarpat, maalaaruteqartarfik pineqartut ullormoortumik akiliisussanngortitsinerisigut pinngitsaaliissummik akiliisissinnaavai, taakkulu sioqqutsisumik eqqartuussinertaqanngitsumik pinngitsaaliissummik naammassitinneqarsinnaapput.

| | |
|--|--|
| | <p>§ 2</p> <p>Inatsisartut inatsisaat manna 1. januar 2021-mi atuutilissaaq.</p> |
|--|--|

3. Pisortat aningaasaqarnerannut allaffissornerannullu kingunerisassat

Siunnersuut maannarpiaq pisortat aningaasaqarnerannut allaffissornerannullu kinguneqartussaangilaq.

Kisiannili siunnersuummi sanaartugassat ilaanni maleruagassat atuuttut suliassap piffissaq eqqorlugu aningaasaqarnerullu iluani naammassineqarnissaanut killiliisut paasineqartillugu, neqeroruteqartitsinerup ingerlanerata eqaallisarneqarnissaa siunertarineqarpoq. Allangguutissat ilanngunneqarpata, siunissami allaffissornikkut pisariillisaanerit aqutigalugit aningaasaqarnikkut sipaagaqartoqarsinnaanissaa naatsorsuutigineqarpoq.

4. Inuussutissarsiornermi aningaasaqarnermut allaffissornermullu kingunerisassat

Siunnersuut maannarpiaq inuussutissarsiornermi aningaasaqarnermut allaffissornermullu kinguneqartussaangilaq.

Kisiannili siumoortumik nalunaaruteqartarnerup atuutinneqalerneratigut sanaartornermik inuussutissarsiuteqartut suliassaminnik piareersaanissamut pitsaanerusunik periarfissaqalissapput, tamannalu sanaartornerup pitsanngorsarneqarneranut iluaqutaasussaassaaq.

5. Avatangiisinut, Pinngortitamut inuillu peqqissusaannut kingunerisassat

Siunnersuut avatangiisinut, pinngortitamut inuillu peqqissusaannut kinguneqassangilaq.

6. Innuttaasunut kingunerisassat

Siunnersuut maannarpiaq innuttaasut aningaasaqarnerannut allaffissornerannullu kinguneqartussaangilaq.

7. Kingunerisassat annertuut allat

Siunnersuut annertuunik allanik kinguneqartussatut naatsorsuutigineqanngilaq.

8. Tusarniaaneq

Siunnersuut piffissami 17.12.2019 – 21.1.2020 Naalakkersuisut tusarniaanernut nittartagaatigut tamanut ammasumik tusarniaassutigineqarpoq, aammalu tusarniaaffiusunut ukununga toqqaannartumik nassiunneqarsimalluni:

Naalakkersuisut Siulittaasuata Naalakkersuisoqarfia, Pinnngortitamut Avatangiisinullu Naalakkersuisoqarfik, Aningaasaqarnermut Naalakkersuisoqarfik, Aatsitassaqaarnermut Naalakkersuisoqarfik, Ilinniartitaanermut, Kultureqaarnermut Ilageeqarnermullu Naalakkersuisoqarfik, Nunanut Allanut Naalakkersuisoqarfik, Inuussutissarsiornermut, Nukissiuuteqaarnermut, Iisimatusarnermut Suliffeqaarnermullu Naalakkersuisoqarfik, Aalisarnermut, Piniarnermut Nunalerinermullu Naalakkersuisoqarfik, Isumaginninnermut Inatsisinillu Atuutsitsinermut Naalakkersuisoqarfik, Peqqissutsimut Naalakkersuisoqarfik, Inatsisartut Allattoqarfiat, Kommune Kujalleq, Kommuneqaarfik Sermersooq, Qeqqata Kommunia, Kommune Qeqertalik, Avannaata Kommunia, Kalaallit Nunaanni Eqqartuussivik, Sulisitsisut (GE), Nunaqavissut Suliffiutillit Kattuffiat (NUSUKA), Sulinermit Inuussutissarsiuteqartut Kattuffiat (SIK), CSR Greenland, Transparency International Greenland, Grønlandske Advokater, INI A/S, Iserit A/S, Nuuk City Development A/S, Nukissiorfiit, Mittarfeqaarfiit, Royal Greenland A/S, TELE Greenland A/S.

Piffissap tusarniaaffiusup naanerani akissutit katillugit 14-it tigueqarput.

Pinnngortitamut Avatangiisinullu Naalakkersuisoqarfik, Aningaasaqarnermut Naalakkersuisoqarfik, Aatsitassaqaarnermut Naalakkersuisoqarfik, Peqqissutsimut Naalakkersuisoqarfik, Inatsisartut Allattoqarfiat kiisalu Kalaallit Nunaanni Eqqartuussivik oqaaseqaatissaqaratik nalunaarput.

Kommuneqaarfik Sermersooq, Qeqqata Kommunia, SIK, Transparency International Greenland kiisalu INI A/S siunnersuummut tapersiillutik, kisiannili allanik oqaaseqaatissaqaratik nalunaarput.

GE aamma Nukissiorfiit siunnersuummut tapersiippup, kisiannili ataasiakkaanut allannguutissanik siunnersuuteqarlutik. Grønlandske Advokater-niit aamma oqaaseqaatinik, allannguutissanut siunnersuutitalinnik tigusaqartoqarpoq.

Matuma kinguliani oqaaseqaatit allannguutissanullu siunnersuutit sammineqarput. Tusarniaa-nermi akissuteqaatit naqinnerit uingasut atorlugit naatsumik issuaaffigineqarput.

GE isumaqarpoq, siunnersuut aamma kommunit ingerlatseqatigiiffiisa illuliaannut sanaartugaannullu atuutsinneqartariaqartoq, kommunit ingerlatseqatigiiffii suliat ingerlanneqaarnerini niuernikkut namminersortutullu soqutigisaqartunik suleqateqarsimappata, piginneqataasimappata assigisaannilluunniit inissisimappata.

Tamanna neqerooruteqartarnermut inatsimmi maleruagassiuunneqareermat allannguiffigineqanngilaq. Kommunit ingerlatseqatigiiffiat ingerlatseqatigiiffinnut allatut ilusilikkanut ilaallerpat, ingerlatseqatigiiffik pisussaavoq, neqerooruteqartarnermut inatsimmi maleruagassat

malissallugit. Matumani pisortani piginnittut ingerlatseqatigiiffiit ilusiligaanerinut aalajangeeqa-taasinnaanerat pillugu oqaaseqaat innersuusutigineqarpoq, tak. nassuiaatini § 1, imm. 2.

GE-mit siunnersuutigineqarpoq, neqerooruteqartitsisup neqerooruteqartumut, neqerooruteqarnissamut soqutiginninnerminik siumoortumik nalunaaruteqarsimanera tunngavigalugu kinaassusersiorfiunngitsumik itigartitsinissamut tunngavilersuuteqarnissaa pinngitsoortin-niarlugu § 25 a, imm. 5 sukannernerulersinneqassasoq. Tamatumunnga atatillugu aamma GE siunnersuuteqarpoq, aalajangersakkap allanngortinneqarnissaa eqqarsaatigineqassasoq, taamaalilluni neqerooruteqartut, neqerooruteqarnissamut soqutiginnillutik nalunaaruteqarsi-masut tamarmik neqerooruteqarnissamut inatsisitigut pisinnaatitaaffeqaassallutik.

Tamanna neqerooruteqartarnermut inatsimmi maleruagassiuunneqareermat allannguiffigine-qanngilaq, tak. siunnersuummut nassuiaatit. Siunnersuummut nassuiaatit nalinginnaasut naapertorlugit siumoortumik nalunaaruteqartoqarnerani neqerooruteqartitsisoq killilimmik siumoortumik neqerooruteqartitsinermut piumasaqaatit, imaluunniit toqqartukkanik neqe-rooruteqartitsinissamut piumasaqaatit naammassineqasimanersut pillugu misissuinissamut periarfissinneqassaaq. Neqerooruteqartunit pingasunit amerlanerusut neqerooruteqarnissamut soqutiginninnerminnik nalunaarpata, tamanna soorunami suliassap tamanut ammasumik neqerooruteqartitsivigineqartariaqarneranik kinguneqartariaqassaaq (kikkut tamarmik neqerooruteqarnissamut periarfissaqassapput). Aalajangersakkamut nassuiaammi erseqqissarne-qarpoq, neqerooruteqartitsisup neqerooruteqartut akornanni kinaassusersiuunnginnissamut assigiimmillu pinninnissamut maleruagassat tamanut atuuttut pinngitsoorani malissagai, tak. neqerooruteqartarnermut inatsimmi § 7, imm. 3.

§ 25 a, imm. 2-mut tunngatillugu Nukissiorfimiit siunnersuutigineqarpoq, siumoortumik nalunaaruteqarneq suliassamut naligititassatut missiliorneqartoq pillugu paasisutissanik imaqartoq pillugu piumasaqaat taamaatinneqassasoq. Nukissiorfiit tamatumunnga tunngavilersuutitut allappaat, misilittakkat malillugit neqerooruteqartup neqeroorummik tunniussinnermini taamaallaat suliassanut naligititassatut missiliukkat isiginiartaraat, suliassarpiat annertussusii aammalu neqerooruteqarnermini naatsorsukkanut tunngaviusut eqqarsaatiginagit.

§ 25 a, imm. 2-mi aalajangersagaq allanngortinneqarpoq.

Peqatigiiffik Grønlandske Advokater siunnersuuteqarpoq, qanoq ilinerani neqerooruteqaqquisoqarnissaanut neqerooruteqartarnermut inatsimmi aningaasanut killiliussat qaffasinnerpaaffissaat kommunit ingerlatseqatigiiffiit atuutissanngitsut. Tassunga taarsiullugu peqatigiiffik isumaqarpoq, kommunit ingerlatseqatigiiffiisa neqerooruteqaqquis-neranni siunnersuummi killiliussamit 1.500.000 koruuniusumit (§ 20) qaffasinnerunga-at-siartariaqartoq. Peqatigiiffimmit tunngavilersuutigineqarpoq, kommunit ingerlatseqatigiiffi

neqerooruteqartitsisarnermut inatsisit eqqarsaatigalugit pisortani suliaasaqarfittut paasineqarsinnaammata, taamaattumillu tamanna peqqutigalugu neqerooruteqaqqusisarnermi killiliussamut taamaattumut ilaatinneqartariaqaratik. Tassani danskit suliaasaqarfimmut inatsisaat innersuussutigineqarpoq, neqerooruteqaqqusinermik atuinermi killiliussanit assingusunit pisortat suliaasaqarfii ilaatinneqartannimmata.

Allannguisoqanngilaq. Siunnersuutip ilusilernerqarnerani tunngaviusumik nunami sumiiffinni inuiaqatigiinnilu pissutsit aallaavigineqarput, taakkunani pingaartumik illuliortiternermi sanaartormilulu niuernermi pissutsit immikkut ittuunerat eqqarsaatigalugu, tak. Siunnersuummut nassuiaatit nalinginnaasut. Pisortat sanaartortitsisut – taamatullu Namminersorlutik Oqartussat taassumalu ingerlatseqatigiiffiutai, kiisalu kommunini oqartussaasut kommuninilu ingerlatseqatigiiffiit – illuliortiternermi sanaartormilulu pingaarnersatut inissisimapput, unammilleqatigiinnerlu sumiiffinni arlalinni equngareerpoq. Taamaattumik inatsisitigut maleruagassiuussineq sumiiffinni allani naleqquttoq maani nunatsinni naleqquttuusariaqanngilaq. Nunatsinni kommuninit tallimaasunit tusarniaanermi akissuteqaatinik marlunnik tiguisoqarpoq, taakkulu marluullutik toqqaannartumik oqaatigaat, kommunini ingerlatseqatigiiffiit siunnersuut malillugu neqerooruteqartarnermut inatsimmi aalajangersakkanik isiginiagaqartarnissamut pisussaaffeqartinneqarnissaannut tapersiillutik.

Grønlandske Advokater inassuteqarput, Pisortat Pisiniartarnerannut Neqerooruteqartitsisarneq pillugu Maalaaruteqartarfimmut maalaaruteqartoqarsinnaanera apeqqutaatinnagu, maalaaruteqarnissamut aalajangersakkat allannngortinnagit neqerooruteqartarnermut inatsimmut ilanngunneqassasut. Peqatigiiffik isumaqarpoq, inatsisitigut isumannaassuseq eqqarsaatigalugu maalaaruteqarsinnaanermut aalajangersakkat, inatsimmi maalaaruteqarsinnaatitaaffiusuni toqqaannartumik allassimappata naleqqunnerpaassasoq.

Allannguisoqanngilaq. Siunnersuummut nassuiaatit naapertorlugit neqerooruteqartarnermut inatsimmi aalajangersakkanik unioqqutitsinerit pillugit maalaaruteqarsinnaaneq allannngortinneqanngilaq. Maalaaruteqartarnermut tunngatillugu inatsimmi allami aalajangersakkanut innersuussisoqarnera ataatsimut isigalugu inatsisitigut isumannaassutsip nalornissutigineqalerneranik kinguneqartariaqanngilaq. Minnerpaamik oqimaaqataanik paarlattuanillu aalajangersagaq ataaseq inatsisini assigiinngitsuni marlunni allassimassappat nassuiaanissaq nalornissutigineqalersinnaavoq, taamaalillunilu inatsisitigut isumannaassuseq nalornissutigineqalersinnaalluni.

Inatsisissatut siunnersuummi aalajangersakkanut ataasiakkaanut nassuiaatit*§ 1-imut*

Nr. 1-imut

§ 1-imut.

Imm. 2, nr. 1-imi kommunit ingerlatseqatigiiffii inatsimmut ilaatinneqartut erseqqissarneqarpoq.

Nr. 2-mut

Imm. 3, nr. 2 naapertorlugu sanatitsisut namminersortut, inissianik aningaasalersuisarnermut inatsit naapertorlugu taarsigassarsinissamut neriorsuuteqarfigineqartut inatsimmut ilaatinneqanngillat. Matumani maannamut suleriaasiusimasoq ingerlateqqinneqarpoq, taannalu malillugu inissialiortut namminersortut, aningaasanut inatsimmi oqaasertaliussaq naapertorlugu taarsigassarsinissamik neriorsuuteqarfigineqartut inatsimmut ilaatinneqanngillat.

Nr. 3-mut

§ 8-mut.

Imm. 1-imi suliassat akiligassiiffigineqarlutik suliarineqarsinnaasut nalingisa qummut killissaat nutaaq 500.000 koruuniusoq ivertinneqarpoq.

Nr. 4-mut

§ 13-imut.

Imm. 2-mi aalajangersakkami nunap immikkoortuani pissutsit peqqutaallutik entreprenørit aalajangersimasut – pingaarnertut najukkani entreprenørit – kisimik suliassamik isumaginninnissamut periarfissaatillugit, siumoortumik neqerooruteqartitsinngikkaluarluni killilimmik suliariumannittussarsiuussinerup atorneqarsinnaanissaanik periarfissiinissaq siunertarineqarpoq.

Avataaniit entreprenørit suliassamut minnerusumut akunnattumilluunniit angissusilimmut neqerooruteqarsinnaassappata, tamatumani siumoortumik neqerooruteqartitsinngikkaluarluni killilimmik suliariumannittussarsiuussinerup atorneqarnissaanik atuinissamik akornutaasooqartariaqanngitsoq naliliisoqarpoq.

Siumoortumik neqerooruteqartitsinngikkaluarluni killilimmik suliariumannittussarsiuussinerup § 25, imm. 4 naapertorlugu allagarsiissutigineqarsimanissaa aalajangersakkap atorneqarnissaanut piumasarineqarpoq.

Nr. 5-imut

§ 20-mut.

Imm. 1, nr. 1-imi sanaartugassat isumaqatigiissuteqarfiusumik neqerooruteqartitsiviusinnaasut nalinginut tamarmiusunut qummut killissarititaq 1.500.000 koruuniusoq ivertinneqarpoq.

Pisortani neqerooruteqartitsisut unammilleqatigiinnermik qulakkeeriniarlutik pingaarnertut isumaqatigiissuteqarfiusumik neqerooruteqartitsinernik, pingasut tikillugit amerlassusilinnik pissarsiniarnissamut periarfissamik atuisariaqarput.

Imm. 1, nr. 3 erseqqissaanermik imaqarpoq, tassanilu "qinnuteqaatit" siumoortumik neqerooruteqartitsinermut tunngasuusut ersarissumik allassimavoq. Tamatuma saniatigut erseqqissaatigineqarpoq, neqeroorutit sanatitsisup missingersuutaanut naleqqiullutik qaffasippallaartut naleqqutinngitsutut isigineqartussaasut.

Imm. 1, nr. 4-mi aalajangersarneqarpoq, ilaatigut nunami pissutsit peqqutaallutik suliffeqarfiit aalajangersimasut pingasunit amerlanerunngitsut suliassamik naammassinninnissamut periarfissaqartillugit isumaqatigiissuteqarfiusumik neqerooruteqartitsineq atorneqarsinnaasoq.

Isumaqatigiissuteqarfiusumik pingasut tikillugit neqerooruteqartitsisoqarsinnaanera eqqarsaatigalugu, neqerooruteqartut pingasuinnaat neqerooruteqarnissamut periarfissaqarpata isumaqatigiissuteqarfiusumik neqerooruteqartitsinerup atorneqarsinnaanissaa pissusissamisuusaaq naapertuutissallunilu. Oqaatigineqartutut tamanna nunami pissutsinik peqquteqarsinnaavoq, kisiannili aamma najukkami pissutsit allat peqqutaaqataasinnaallutik.

Imm. 1, nr. 4 naapertorlugu isumaqatigiissuteqarfiusumik neqerooruteqartitsinissamut suliassap § 25, imm. 4 naapertorlugu siumoortumik nalunaaruteqarnikkut allagarsiissutigineqarsimanissaa piumasaqaataavoq.

Nr. 6-imut

Kapitali 6 A-mi aalajangersakkat neqerooruteqartitsisut siumoortumik nalunaarutit, tusagassiorfitsigut aamma tusagassiuutit elektroniskiusut atorlugit tamanut nalunaarutigineqartut aqquutigalugit suliassat pilersaarutaasut ilisimatitsissutigineqarnissaannut periarfissiipput.

§ 25 a-mut

Imm. 1-ip atuutilerneratigut pisortani neqerooruteqartitsisup tunngaviusumik suliassanut, piffissami siumoortumik nalunaarutip atuuffigisaani neqerooruteqartitsisup neqerooruteqarfigitassatut naatsorsuutigisaanut tamanut paasissutissat paasissutissiissutigisariaqarpai. Kisiannili neqerooruteqartitsisoq siumoortumik nalunaarummi suliassat pilersaarutigineqartut ilaannut killiliisinaavoq. Suliassat ilaasa sularineqarnissaat annertuumik nalornissutigineqarpat, imaluunniit neqerooruteqartitsisup neqerooruteqartitsivineqartussani ataaseq amerlanerusulluunniit siumoortumik allagarsiissutiginiarnagit kissaateqarneranut peqqutit immikkut ittut allat atuuppata tamanna naapertuutissaaq.

Imm. 2-mi siumoortumik nalunaarut minnerpaamik paasissutissanik sunik imaqassanersoq aalajangersarneqarpoq.

Imm. 3-mi siumoortumik nalunaarutit ullormit siumoortumik nalunaarutip saqqummiunneqarfianit sivilunerpaamik qaammatinut aqqaneq marlunnut atuuttussaananerit aalajangersarneqarpoq.

Imm. 4-5 siumoortumik neqerooruteqartitsinani aamma isumaqatigiiffiusumik neqerooruteqartitsinani killilimmik neqerooruteqartitsinermut maleruagassanik immikkut ittunik imaqarput.

Siumoortumik nalunaarutip tamanut ammasumik saqqummiunneqarnerani, neqerooruteqartitsisoq ajornaatsumik neqerooruteqarnissamat soqutiginnittunut suliassat sularineqarnissaat pillugu saaffigineqquisinnaavoq.

Neqerooruteqartitsisoq sinnersuummi § 13, imm. 2-mi atuutsitsiviunnginnissamat maleruagassaq naapertorlugu siumoortumik neqerooruteqartitsinani killilimmik neqerooruteqartitsinissamik kissaateqarpat, taamatut aggersaanissaq pinngitsoorani pisussaavoq. Taamatut pisoqartillugu tamanut ammasumik siumoortumik neqerooruteqartitsinissamat taarsiullugu siumoortumik nalunaaruteqarneq atorneqassaaq.

Aamma neqerooruteqartitsisoq sinnersuummi § 20, nr. 4-mi atuutsitsiviunnginnissamat maleruagassaq naapertorlugu isumaqatigiiffiusumik neqerooruteqartitsinissamik kissaateqarpat, siumoortumik nalunaaruteqarnikkut neqerooruteqarnissamat soqutiginnittunut aggersaanissaq pinngitsoorani pisussaavoq.

Tassalu neqerooruteqarsinnaasut, suliassanik naammassinninnissamat periarfissaqartut ikittuinnaasut (pingasut ikinnerusulluunniit) naliliisoqarpat, siumoortumik nalunaaruteqarneq illuaqutaasumik atorneqarsinnaavoq. Nalinginnaasumik nunap immikkoortuani pissutsit taamatut pisoqarnissaanut tunngaviliisarput, kisiannili aamma pissutsit allat pisoqataasinnaallutik.

Imm. 4-mi aalajangersakkami allassimavoq, neqerooruteqartitsisoq siumoortumik nalunaarutip tamanut ammasumik saqqummiunneqarneraniit sivikinnerpaamik sapaatit akunneri arfineq pingasut qaangiutsinnagit, suliassamut imaluunniit suliassanut pineqartunut neqeroorutiniq aalajangersimasunik pissarsiniarsinnaanngitsoq. Aammattaaq piumasaaqatigineqarpoq, siumoortumik nalunaarut minnerpaamik paasissutissanik, aalajangersakkami allassimasunik imaqtartussaasoq. Tassalu suliassaq suliarineqartussaq imaluunniit suliassat suliarineqartussat, kiisalu sumi qaqugulu suliarineqarnissaat naatsumik allaaserineqassapput. Tamatuma saniatigut neqerooruteqartitsisoq paasissutissanik allanik, soorlu pisumi aalajangersimasumi naleqquttut naliliiffigineqarpat suliassamut naligitassat missiliukkanik aalajangersinnaavoq. Aamma neqerooruteqartitsinerit ataasiakkaat qaqugukut ingerlanneqarnissaat pilersaarutigineqarnerisq siumoortumik nalunaarummi allassimassaaq.

Neqerooruteqarnissamut soqutiginnittut, siumoortumik nalunaaruteqarneq tunngavigalugu nalunaartut toqqartuinnermi ilaatinneqarnissamut inatsisitigut pisussaaffeqanngillat. Kisiannili neqerooruteqartitsisup soorunami neqerooruteqartarnermut inatsimmi § 7, imm. 3 naapertorlugu kinaassusersiornissamut assigiimmillu pinninnissamut tunngaviusut malittussaavai.

Imm. 6 maalaaruteqartarnermut aalajangersakkanik imaqarpoq. Neqerooruteqarsinnaasut, siumoortumik nalunaarut tunngavigalugu suliassamut neqerooruteqarnissamut soqutiginninnerminnik nalunaaruteqartut, neqerooruteqartitsisup aalajangiineranut akerliliinissamut periarfissaqarput. Tassalu neqerooruteqartoq isumaqaruni neqerooruteqartitsisoq eqqunngitsumik – siumoortumik nalunaaruteqarearluni – suliassamut isumaqatigiissuteqarfiusumik neqeroortitsisimasinnaasoq, imaluunniit siumoortumik neqerooruteqartitsinani killilimmik suliariumannittussarsiuussisimasinnaasoq maalaaruteqarnissamut periarfissaqarpoq.

Ullormit siumoortumik nalunaarutip tamanut ammasumik saqqummiunneqarfianiit, sapaatit akunnerini sisamani siumoortumik nalunaarut tunngavigalugu aalajangiinerit pillugit maalaaruteqarnissamut piffissaqartitsisoqarnissaa aalajangersarneqarpoq.

Nr. 7-mut

§ 26-mut

Aalajangersakkami neqerooruteqartarneq pillugu inatsimmi aammalu maleruagassani, taanna tunngavigalugu aalajangersarneqartuni aalajangersakkanik unioqqutitsineq pillugu maalaaruteqartoqarsinnaanera qulakkeerneqarpoq.

Nr. 8-mut

Pisortani Pisiniartarnernut Neqerooruteqartitsisarnermut Maalaaruteqartarfik pillugu Inatsisartut inatsisaata (maalaaruteqartarfik pillugu inatsit) atuutilerneratigut, neqerooruteqartarnernut inatsimmi §§ 27-34-mi maalaaruteqarnissamut aalajangersakkat atorunnaarsinneqarput. Tamanna neqerooruteqartarnernut inatsimmi aalajangersakkanik unioqqutitsinerit pillugit maalaaruteqarsinnaanerup peerneqarneranik isumaqanngilaq, tassunga taarsiullugu maalaaruteqarsinnaaneq maalaaruteqartarfimmut inatsimmi maleruagassiuunneqarmata.